

Augsburg, 1. April 1580

An Theodor Zwinger

UB Basel, Fr. Gr. II 27, Nr. 269.

S. Michael Isengrinius edidit anno 1551 Simplicij *Categorias* cum Iusti Velsij annotationibus. In cuius operis fine significat, penes se esse *Commentaria in 8 libros φυσικῆς ἀκροάσεως* et 4 libros de caelo: *Interpretationem Enchiridij Epicteti*, *Expositionem epistolarum Epicteti*, et *commentaria in Iamblichī de secta Pythagorica libros 3*. Quorum operum, clarissime vir, D[omine] et amice obseruande, hactenus nihil (ab illo quidem editum) mihi videre contigit. In primis autem Epictetea desidero. Nam illa mendoſiſſimē excusa Venetijs à Sabijs, diuinare me saepè coegerunt: de *encliridij expositione loquor*, etsi et in Arriano sategi rerum mearum. Epistolas autem nunquam vidi. Cum autem cupiam Epictetum integrum (quantum quidem eius operum extat) ante discessum ex hac vita meum (si quem modò typographum inuenero) et emendationem et Graecè Latineqū simul loquentem, edere: quod in profana philosophia nihil illius viri disputationibus neruosius et efficacius legisse videor: pergratum mihi feceris, si Epictetea illa, tua fide à possessoribus impetrata, ad me per occasionem miseris. ἐγγνήσαν τι δ' ὑπὲρ ἔμοῦ οὐκ ἔσται Ἀτη, ἀλλὰ πολλὴ ἀσφάλεια καὶ χάρις, καὶ ταχίστη ἀπόδοσις. Ea enim natura sum, ut aliena omnia quam primum ex aedibus meis extrudere cupiam. Sin diffident: non recusabo eos libros tolerabili precio emere: quamuis neque nummis abundans, et nihil ferè ex lucubrationibus meis lucrari solitus, praeter proscriptionem pontificiam, et aemulorum calumnias. IESVITAE felicius apud nos σοφιστεύουσι: nuper ex uno Fuggerano testamento 40 000 florinorum accessione aucti, βασιλεῖς βασιλέων ὄντες, καὶ τοῖς τυράννοις νομοθετοῦντες. Neque illi prius conquiescent, quam aut, aut: caetera intelligis. ἔχει γὰρ θεὸς ἔκδικον ὅμια: et non ignota est Templariorum πανολεθρία. Illud certè iam consecuti sunt: ut explosis omnium nostratrum scriptis, in plerisque scholis sua regnent. Iidem et bibliothecas priuatas compilant, neque Wolfianis scriptis in ijs relinquunt locum: sed callidè per causam religionis bibliothecas suas sine sumptu augent. τοιαύτη ἔστιν ἡ τῶν καθ' ἡμᾶς καιρῶν φορά. Sed et veteres autores suo arbitratu et mutant et mutilant: castratis etiam Erasmi chiliadibus. Ego vero gratiam habeo Episcopio nostro τῷ ἔκείνας πολλαῖς προσθήκαις αὐξήσαντι. Ab eodem expecto nunc et Hippocratem tuum, et thesaurum: de quo mihi superiore anno scripsisti. Eundem rogaui, ut mearum nugarum exempla tibi daret: quae etsi tuo conspectu indigna scio: meam tamen tui memoriam, cum qualicunque grati animi significatione, testari possunt. Vale. Augustae Vindelicorum. Cal[endas] Aprilis. Anno 1580.

Hiero[nymus] Wolfius
tui studiosissimus.

Norimbergensis Senatus, impetratis Altorpiano gymnasio Academicis priuilegijs, quaerit professorem iuris, et Medicum, qui et physica doceat. Si quos iuuenes liberaliter eruditos, et κατὰ τὴν πρᾶξιν rerum suarum adhuc satagentes, nosti: de ijs ad me scribas velim: ut eos veteribus patronis meis commendare possim. De Hotomano despero: D. Busereuttus vereor ut satis autoritatis habeat. Veterani in talem solitudinem haud facilè se conferent.

Ignosce quaeso litoris, vel potius pigriciae meae.